

Aruba su coordinador nacional di task force contra traficacion di hende ta un heroe global

Jeannette Richardson-Baars ta ricibi TIP Hero Award di Secretario di Estado di Merca Hillary Clinton



Aki por mira Jeannette Richardson-Baars un heroe global den e lucha contra traficacion di hende, ta pose na Washington hunto cu Ministro Plenipotenciario Joseline Croes, y tambe actor Will Smith y su esposa Jada Pinkett-Smith.

ORANJESTAD (AAN): Riba Diamars Secretario di Estado di Merca, señora Hillary Clinton a nombra Comisario Interino di Cuerpo Policial di Aruba y Coordinador Nacional di e Task Force Contra Traficacion di Hende, Jeannette Richardson-Baars un heroe global den e lucha contra traficacion di hende.

Señora Richardson-Baars a ricibi e reconocimiento pa su esfuersonan pa trece e lucha contra traficacion di hende na atencion di e comunidad na Aruba. El a crea un plataforma di colaboracion cu a haci posibel pa stakeholders na Aruba, como tambe regionalmente por reconoce, actua contra y sentencia esnan cu ta haci nan mes culpabel na e acto aki. Loke ta worde considera mas importante ainda, ta cu e plataforma tambe ta provee e victimanan cu luganan unda nan ta sigur y for di peligro.

E reconocimiento ta dedica na señora Richardson-Baars su trabao den e region Caribense y e esfuersonan di Aruba pa elimina traficacion di hende, manera ta stipula pa e seccion di Traffic in Persons (TIP) di US State Department. E seccion aki ta supervisa con nacionnan ta coordina nan esfuersonan pa elimina traficacion di hende, cual ta worde considera e crimen mas grandi contra humanidad di siglo 21.

"E reconocimiento aki ta bin como un sorpresa completo pa mi," señora Jeannette Richardson-Baars a comenta. E Consulado Mericano na Curaçao ta esun cu a manda su nomber pa worde considera como un nominado pa e TIP Hero Award. Bao di su liderazgo, Aruba a tuma pasonan grandi pa combati traficacion di hende pa medio di campananan di conscientisacion intensivo

y introduccion di legislacion mas estricto na aña 2006.

E importancia di conscientisacion publico: Conscientisacion ta crucial no solamente bao di esnan involvi den e sistema di husticia, pero tambe bao di e comunidad general. Aunke cu medianan limita, Aruba a implementa un campaña simpel, pero hopi in-

tensivo unda cu a siña e comunidad pa reconoce e señalnan di traficacion humano y ki pasonan pa tuma contra di esaki.

E comunidad a worde haci consciente cu traficacion humano y explotacion of abuso di hende, den e ambiente di prostitucion of trabao, ta un violacion di derechonan humano.



"Esaki no ta e resultado di solamente mi trabao, pero e resultado di e dedicacion di tur hende involvi den e Task Force pa Traficacion di Hende di Aruba," señora Richardson-Baars a bisa.

'Habri Bo Wowo': Pa medio di e campaña "Habri Bo Wowo" autoridadhan di Aruba a haya un miho bista ariba e areanan sensitivo pa cu traficacion di hende. Cu ayudo di arubianonan consciente a haya sa unda e victimanan por ta. E victimanan mes tambe a ricibi informacion tocante nan derechonan pa medio di e campaña y cu e ley nobo, nan

ta sigura di haya proteccion for di autoridadhan.

Aruba tambe a ricibi un bon evaluacion den e TIP Report di 2011. E raport ta reconoce e esfuersonan y pasonan tuma na nivel di legislacion como tambe conscientisacion. E raport a menciona investigacionnan criminal tumando lugha na Aruba, como tambe e determinacion di e isla pa persigui esnan cu ta participa na traficacion di hende.

Tanto e TIP Report di 2011 y e TIP Hero Award ta reconocementonan pa Aruba pa cu su compromiso pa uni su mes na e comunidad global den e lucha contra traficacion di hende.

